

LOCAL

No criticá si bo no sa e costo di Lighting Parade

Hopi ta e comentario cu e Lighting Parade e aña aki a laga hopi di deseá. Esaki ta haci hopi dolor ya cu ningun cu ta corre lanza e comentario no ta para pensa un rato cuanto hopi placa ta wordo hincá den e paradanan di Tivoli.

E razon pakiko Tivoli a laga SAC na 1978 ta pa e simpel motibo cu e presidente di e organisacion aki, a duna di conocé cu nunca mas Tivoli lo por logra saca Reina y promé cu eleccion a terminá ya caba e Prins & Pancho tabata sa caba kiko ta kiko. Desde e tempo ey y te awe Tivoli no tin nada di haci cu SAC.

Pa yega na loque Tivoli su miembronan ta saca pa nan jiunan participá den Carnaval, bo mester tin fondo pa tal y smaak. Ya cu manera nos a comentá caba e mesun mayornan cu ta participá den Ballonnenoptocht ta esnan cu nan

jiunan ta haci mayoría di e shownan cu ta compañá e reinanan, mesun mayornan ta participá na San Nicolas y mester di drecha e carozza completamente di nobo y ta participá por último na Lighting Parade cu no ta facil. Ta hopi costoso.

Pa cuminsá un grupo cu ta bai cu carozza. Un carozza no ta baha bao di 10.000 florin, sin conta aden tur e stringnan di luz. Despues mester dividí e gastonan di banda cu no ta baha bao di 5000 florin. Esaki lo ta wordo dividí den 4 famía.

Si nos tuma ehempel di e Grupo Beauty & the Beast, e banda su costonan a wordo dividí entre dos famía so.

Quasi p.e. a pidi desde un principio 10.000 florin cu a wordo rebahá te cu 3000 florin ya cu nan no ta haya tocá. Pa un bistí bo ta gasta no menos cu 500,-- florin na tela, un cosedó ta cobrabo no menos cu 100

florin.

Y por último, como participante di Lighting Parade por bisa cu si e parada e aña aki a tuma 45 minuut pa pasa dilanti esnan pará na banda, y un parada di mucha cu a conta cu 19 grupo a dura dos ora, no por bisa cu Lighting Parade e aña aki a laga hopi di deseá. Di tempran, nos di Alegria y Fantasia a bisa cu Ballonnenoptocht ta bai Lighting y esaki lo siqui asina tambe. Si e pueblo no ta gusta esaki, anto quizas Tivoli ta haya su mes obligá na laga un di nan cai, sea Ballonnenoptocht lo wordo eliminá pa concentrá riba Lighting so, of viceversa.

Ta na su lugar pa duna Ceasar loque ta di Ceasar, e tabata chikito pero grandioso, asina mes no tabatin ningun luz mas na Aruba. No ta kita afó, cu Tivoli lo keda e club cu a inicia Carnaval y cu merecé un reconocimiento pa esaki. □

